

Չոչակաւոր վանքը բոլորովին ամայի էր: Մի ալեւոր արեղայ միայն կանգնած էր բակում, կուտ էր ձգում հաւերին, որ այդ միջոցին խմբած էին նրա շուրջը:

Տեսնելով նորեկներին մօտեցաւ նա:

– Այդ ֆրանկները ինչո՞ւ են եկել, – մի կողմ տանելով, հարցրեց երիտասարդից:

– Ֆրանկներ չեն, – պատասխանեց երիտասարդը, – այդ պարոնը հայ է, ես նրան ճանաչում եմ... Դա այն մարդն է, որի համար մեռնելու ժամանակ լուսահոգին ասաց, թէ երբ գալու լինի, իմ իր, եղէնները նրան յանձնեցէք:

– Որտեղի՞ց են գալիս:

– Ամերիկայից: Նրա տիկինը ամերիկացի է:

Պարոնը նայում էր դեպի իր շուրջը: Շատ տարիներ առաջ տեսած փառաւոր վանքը այժմ նրա վրայ տխուր տպաւորութիւն էր գործում:

– Ինչո՞ւ այդպէս թշուառ դրութեան մէջ է այդ վանքը, – հարցրեց նա արեղայից:

– Մի ժամանակ այդ վանքի սեղանատանը հարիւրաւոր միաբաններ ճաշի էին նստում: Հիմա ո՞վ է մնացել: Ես, այդ հաւերը, մէկ էլ այդ մարդը: – Նա ցոյց տոեց երիտասարդին: – Վանքի բոլոր հողերը խլեցին, մեզ թողեցին առանց կտոր հացի: Նստած, օրերով, ամիսներով նայում ենք դեպի դուռը, գուցէ մի մոլորած ուխտաւոր ներս կմտնէ: Այն էլ չկայ: Ուխտ էլ չեն գալիս: Հաւատն ու ջերմեռանդութիւնը պակասել է: Եթէ հազարից մի անգամ մէկը ներս է մտնում, տոած արդիւնքը այնքան էլ չի լինում, որ գոնէ ապրել կարողանանք:

Գուցէ վշտացած արեղան դեռեւս երկար կը շարունակէր իր գանգատները, եթէ նորից պարոնը քաղաքավարութեամբ չընդհատէր նրան, յայտնելով, թէ ինքը շտապում է եւ ուշանալու շատ ժամանակ չունի:

Նրանք մտան հանգուցեայի խուցը: Նա այնքան փոքրիկ էր, որ բոլորի համար տեղ չկար: Երեխաները մնացին դրսում, ման էին գալիս վանքի բակում:

Ամէն ինչ սովորական տեղումն էր. նոյն փայտեայ հասարակ մահճակալի վրայ դեռ տարածած էր անկողինը, նոյն կաղնեայ գրասեղանը դրած էր նեղ լուսամուտի հանդէպ, իսկ նրա առջեւ դեռ կանգնած էր հին, գեղաքանդակ բազկաթոռը, որ միակ զարդն էր այդ տխուր բնակարանի: Գրասեղանի վրայ ածած թղթերը, ցամաքած կաղամարը, փետուրեայ գրիչները,